

壬柴志稿

壬癸志稿十九

太倉錢寶琛伯瑜輯

同里

葉裕仁涵溪
季錫疇崧耘
趙兆熊耳山
畢庭杰雄伯

參校

名宦

鎮洋縣

知縣

國朝

陶士僕字倫宰甯鄉人雍正元年進士以庶吉士授知縣時鎮洋新立士僕至規模多所創定為治尚靜鎮士民安之在任四年以註誤去後開復陞廣西太平知府

壬癸志稿

鎮洋 名宦

一

唐尊堯字際虞龍里人康熙五十年舉人雍正七年知縣事性强敏善折獄部民一見即識其人吏不能欺十年海溢漂沒田廬溺死三萬餘人尊堯躬至海上殮埋之災民洶洶不及上請急出俸市粟食之有桀驚者藉眾恣肆陰識其魁捕扶之眾乃定嘉定民入境聚掠親自逐捕遂解散任事五年被劾去士民思之

金鴻字上侯天津籍山陰人進士乾隆四年知縣事政寬仁聽訟以溫語相感動不事鈎抉劉河久患淤塞鴻奉檄開濬躬自督率役不淹時縣新立無志乘鴻延禮邑士大夫纂輯鎮洋縣志以前署東平州事註誤去民

思之不置

冷時松字茂公臨桂人雍正八年進士乾隆十年任縣事性廉介明察杜絕苞苴請託吏胥不得夤緣爲姦二十二年秋潮災時松親歷沿海鄉鎮便宜發粟設賑災黎始得存活劉河楊林潮汐易淤時松以時深濬民不勞而事集又創建婁東書院邑人聞風捐助田畝以資膏火規爲粗就旋調常熟縣去

福安鑲黃旗舉人任鎮洋縣愛民重士前令冷時松創建書院未竟而去安莅任次第經理一切詳備一任一年陞邠州去

壬癸志稿

鎮洋 名宦

二

荆如棠字陰南山西平陸人乾隆十三年進士以檢討出知鎮洋縣事愛民勤政廉潔自守不名一錢如棠雖文士膂力絕人每夜常持稍據鞍遍巡城邑居民不戒於火家有棺眾舁之不能動如棠手出諸烈燄甫一歲調沛縣去

賴晉字錫蕃廣昌人進士乾隆二十二年由安東調鎮洋邑境故有窪地蘆課因開濬劉河并建軍工船廠挖佔蘆田蕩塗地少於前乾隆初兩次清丈案內題請豁免戶部以無年月可核照舊徵收晉莅任力請大吏題咨者四中經部駁者三卒邀 恩旨永遠豁免至今民

德之

馮聖世字疇九漢軍鑲黃旗舉人乾隆四十二年補鎮洋縣性慈善聽訟務寬平愛民重士邑濱海築塘以禦潮患聖世隨時修葺塘工以固閱兵臺前石塘最險要聖世築爲坤卦形以鎮之自後潮無衝突四十六年夏颶風陡作近海皆被淹沒死者無算聖世出資掩埋被災田畝詳請緩徵民皆戴之年七十餘卒於任

章惠字子元山陰人咸豐元年來署縣事以邑志年久未輯請於州牧方傳書捐廉倡修未幾粵匪陷江甯鎮江揚州等府東南震動惠與紳士條設保衛局務昕夕壬癸志稿

鎮洋 名宦 三

視事適州牧求代去兼治州事者市月民安焉旋調南匯土匪據城反脅奪縣印惠死之

佐貳

蕭登生字步瀛華陽人選貢生

職官表
作監生

乾隆二十一年

任鎮洋縣丞恪守官箴攝縣篆一以刻苦自勵間食粥從者苦之有引去者尋調去後官至知府

李鳳彩建水人舉人會試取明通榜乾隆三十一年大挑以知縣用借補鎮洋縣丞歷署州同知及縣篆清廉自愛往往饘粥不給俸滿內陞通政司經歷

孫家藍直隸人乾隆五十五年來署丞事常擯廉從茶

坊酒肆溷跡齊民見有賭博酗酒及欺侮平人者用言
勸諭不聽立提懲責在任有年民情觀感

教職

李鈞字正衡吳縣人廩貢生乾隆十六年任鎮洋訓導
才識敏練屢奉檄委辦公事學政李因培亦信任之後
以卓異陞貴陽府經歷

余大中字南塘宿松人乾隆三十九年以歲貢生任訓
導樸誠待物訓迪士子恆以文行相勸以老去諸生刻
去思文頌之

仲振猷字雲浦泰州人由舉人任鎮洋訓導好學敦品

壬癸志稿

鎮洋名宦

四

教士亦有法度後卒於任

壬癸志稿十九終

